

## MARILENGHE

# Ducj insiemit par meti in vore la gnove leç

di LORENZO PELIZZO\*

**L**a gnove leç sul furlan che e vignarà buride fûr dal Consei Regjonâl intes prossimis setemanis e pant ce tantis novitâts.

Il test, fat bon in commission daspò di un part une vore grivi, al propon une schirie di principis impuartants che a varan di cjatâ une rispueste fuarte di bande di ducj chei che si interessin di robis furlanis.

Par chest l'incuintri che si davuelzarà vuê intal dopomisdì inte Aule grande de Universitât dal Friûl, inmaneât di ents e comitâts, al varà un dopli significât.

Prin di dut, chel di rin-fuarcî la domande de comunitât furlane denant dai sorestants regjonâi in prospettive de aprova-zion definitive dal test di leç intal Consei: juste par dî che cul furlan e cun chês altris lenghis de comunitât regjonâl no si pues scherçâ e chescj provediments a àn di jessi a pro di dute la lenghe e di dut il Friûl.

Ma, tant che secont pont, la cunvigne di vuê e varès di cjapâsi sù une responsabilât une vore grivie e impuartante: ché che i furlans si rindin cont des pussibilitâts e dal impegn che si stan cjapant. Daspò di cheste normative cul furlan no si pues plui scherçâ.

Se la leç e proviôt la pussibilitât di doprâ il furlan in tancj cantins (de scuele fin ae vite publiche) la cuistion si sposte sul fat che ducj a àn di assumisi lis lôr responsabilitàs.

*La Regjon che e à di garanti un jutori fuart e tal timp a dutis chês ativitâts previoududis inte leç: un jutori che a vûl dî bêçs sigûrs, no dome par un o doi agns, ma par un doman di lungje durade.*

*In cheste suaze alore ducj i ents e lis clapis che di simpri a lavorin in chest cjamp a vareassin di colaborâ pe incessite de lenghe. Si varà di metisi insiemit, fevelâsi, resonâ e soredu concuardâ un troi comun indulâ ognidun – seont lis propriis competencis – a varà di dî la sô propueste e il contribût che si sint di dâ.*

*Ae Universitât i spiete l'impegn di alte formazion e di ricercje, ae scuele chel di inscuelâ in e cu la marilenghe, e vie indenant. Su chest la Filologjiche e je simpri pronte a sigurâ il so jutori cui siei cuasi novante agns di storie e esperience sul cjamp in cetancj cantins: formazion, edizioni, biblioteche specialistiche e centri di racuelte pes publicacions in e di lenghe furlane, ricercjis científichis e vie indenant.*

*L'impuartant al è che lis sieltis a sedin condividudis di ducj chei che si interessin di furlan: dome cussì la identitât furlane no vignarà considerade ché di un cuintri di chel altri, ma di chei che – insiemit cu lis comunitâts slovene, todescje e taliane – a fondin la specialitât de nestre Regjon.*

\* President de Societât Filologjiche Furlane